




「永樂北藏」整理委員會

永樂北藏

綫裝書局

御製

天清地寧
風雨調均
烽警不作
化醇俗厚
外順內安
普際光明
大明正統
五年
陰陽和順
百穀常豐
禮教興行
一人皆慈
一統熙皞
既往未來
十一月十一
七政明朗
萬類咸暢
子孝臣忠
物靡害災
九幽六道
俱登正覺
十一日

永樂北藏第一九冊目錄

○大寶積經 一百二十卷 唐菩提流志等譯 (本冊卷第一至卷第四十 龍一—帝十) 一

大寶積經序

龍一

唐 睿 宗 皇 帝 製

朕聞天之爲大也高上下下之容可紀地之爲大也廣縱橫之數可推則知無去無來不生不滅拯沉淪於沙劫救焚灼於塵區毒龍懼其威光醉象憚其神力其大則包於宇宙其小則隱於毫芒七十二君先在陶鈞之內萬八千載即爲俄頃之間漢日載其通暉周星彰其降誕驚頭峯下演金口之微言雞足山中舒玉毫之瑞色干戈不用梵志摧鋒甲冑

無施波旬潰旅闢圓明之淨域啓方便之禪門慧晷耀於昏衢慈雲清於朽宅無得而稱者其惟正覺乎然則教自西方法流東夏馬鳴龍樹肇闡瓊編羅什道安承宣寶偈關中道俗雖傳貝葉之文江左黎元未極蓮華之旨又以元魏迷於釋典宇文扇於魔風開皇之初暫爲修建大業之末遽即分崩我大唐之有天下也睿聖重光文思御曆吞沙靜孽鍊石稱神巢燧執鞭羲農擁篲懸法王之鏡轉梵帝之輪被正朔於蟠桃混車書於細柳

三藏沙門菩提流志者南天竺國淨行婆羅門種姓迦葉氏也年十有二外道出家事波羅奢羅學聲明僧伽等論并曆數呪術及陰陽等年踰耳順遽乃心歸知外法之乖違悟釋教之深妙隱居名嶽積習頭陀初就耶舍瞿沙三藏學經論其後徧遊五天竺國高宗天皇大帝聞其遠譽挹其道風永淳二年遣使迎接天后聖帝應乾司契當宁披圖令住東都居大福先寺譯佛境界寶雨華嚴等經一十一部中宗孝和皇帝循機履運配永登

樞神龍二年令住京下於大崇福寺翻譯此經俄屬靈祐虧徵綿區集禍喬嶽之仙長往茂陵之駕不還朕以庸虛謬膺丕構敬遵前旨勗就斯編法師尋繹故文發揮新句炎涼不懈曉夕忘疲舊翻新翻凡有四十九會總其部帙一百二十卷成以先天二年四月八日畢功進內法師戒珠在握慧炬明心爲法門之棟梁啓僧徒之耳目伏願上資七廟八百之祚長延下及萬方億兆之吐恒逸遠邇寧謐朝野歡娛致澆俗於淳源歸迷生於壽

龍一

二

域暫乘紫機之暇聊題紺帙之前所有會名
具於其目云爾

大寶積經述

唐朝議郎行河南府告成縣主簿徐錡撰

夫日月出矣而輝耀十方時雨降矣而溥漑
萬物況我身常樂湛虛空之相妙覺圓明融
心行之本唯瞭唯昧不生不滅者哉是以闢

無學之地聿修迦蘭啓息言之津亶作羅柰
智勝菩薩起方便之緣淨居天人發成就之
力稱謂所絕者其第一義乎自恒星夜掩仙
虹晝爍青鉢傳其睟容寶棺現其金臂法山
摧仞拂魔箭於危屏直水橫流係慈航於彼
岸烏虡妙藏不可以常秘戒輪不可以終鑿
雖雙林下表示於泥洹逮一千年適被於聲
教龍持貝葉亟傳摩竭之城象負蓮華遂滿
真丹之境三十七品慈悲於火宅一十二經
引喻於沙界矣大寶積經者後漢迦葉摩騰

竺法蘭及今朝玄奘法師菩提流志等咸自
西天竺所致也如來昔在鷲峯利建平等金
口注海酌之而不竭寶言如綸振之而有緒
炯茲瑞憲久翳鴻都原壑屢非市朝多變歷
代徇齊之主競興叅譯跋陀授記之言罕能
丕就洎我唐之有天下也功橫鐵圍化縣忉
利苑禦千界提封萬剎張四攝之扉廣納諸
有騁六道之驥冥濟群惑太上皇以澤深智
海掌耀禪珠神皇帝以勛格梵空曾懸法印
肅敷玄誥昭灑鴻波歷選緇徒明敷列案博

考同異聿興刊緝勇振類綱嚴持絕細爰有
沙門大德思忠東天竺國婆羅門大首領臣
伊舍羅等譯梵文者求善住緣悟無生忍博
聞強識精而譯之復有天竺沙門波若屈多
沙門達摩證梵義者開忍辱場破煩惱衆弼
諧神侶明而辯之復有沙門大德履方宗一
普敬慧覺等筆授者今問孔膠威儀不忒手
握仙札受而字之復有沙門大德深亮勝莊
塵外無著慧迪等證義者國之大師佛之右
臂探諸了義演而證之復有大德沙門承禮

雲觀神曉道本等次文者庇影多林息肩香
窟勤修精進纂而次之復有潤文官者銀青
光祿大夫邠王傳上柱國固安縣開國伯盧
粲銀青光祿大夫太子詹事崇文館學士兼
修國史上柱國東海縣開國公徐堅朝議大
天守中書舍人崇文館學士上柱國野王縣
開國男蘇晉朝議郎給事中內供奉崔璩等
位列鳳墀聲流雞圃分別二諦潤而色之復
有銀青光祿大夫守侍中兼太子左庶子兼
修國史上柱國鉅鹿縣開國公魏知古兵部

龍一

四

尚書上柱國郭元振銀青光祿大夫檢校中
書令上柱國范陽縣開國男張說銀青光祿
大夫行中書侍郎同中書門下三品監修國
史上柱國興平縣開國侯陸象先等朝踐瑣
闥夕遊珠域護持四法總而閱之爾乃杖錫
之士端珪之俊麻列定筵林攢樂土蔭祥雲
而演譯倏換炎涼吸甘露而勤求載淹衡畧
大乘章句義不唐捐小品精微拯無遺溺能
事畢矣佛何言哉今所新翻經凡有四十九
會七十七品合一十二帙以類相從撰寫咸

畢以先天二年六月三十日進太上皇八月
二十一日進皇帝禁聞曉關真教上聞仙宁
克怡宸襟允穆竦鈞陳於白日親御靈臺落
雲雨於彤霄荐加殊尉賢愚稽首以爲利見
仁王真俗歸心以爲潛登覺道次有清信佛
弟子前少府監丞季式顏等皇朝金紫光祿
大夫兵部尚書贈侍中隴西公迥秀子也復
有清信佛弟子前右拾遺徐鑄等皇朝銀青
光祿大夫太子賓客昭文館學士高平公子
也咸屬彼穹降禍私門墜構陟遙岵而崩心

瞻冥途而獻福於是祛篋探筭檀波羅蜜廣
疊簡牋首崇書寫不變槐火遽盈苔袂然後
裝之鏤軸綴以瓊籤羅綵簞而霓舒播珠函
而錦縛方使猛風吹嶽長存妬路之文劫火
燒天不壞多羅之典

大寶積經卷第一

唐三藏法師菩提流志奉 詔譯

三律儀會第一之一

如是我聞一時佛在王舍城耆闍崛山其山
高峻嚴麗可觀持諸雜種猶如大地衆華卉

木悉皆茂盛其中復有天龍夜叉毗舍闍緊
那羅等常所遊止復有種種異類諸獸所謂
師子虎狼麒麟象馬熊羆之屬止住其中復
有無量百千衆鳥所謂孔雀鸚鵡鵠鵒羅鳥
鳬鴈鴛鴦命等類依之而住是諸衆生以
佛威力不爲貪欲瞋癡所惱不相茹食共相
親愛猶如母子是山王中多諸雜樹叢林蓊
鬱枝葉繁榮謂天木香樹菴摩羅樹甄叔迦
樹尼俱陀樹栴檀沉水如是等樹無不備有
復有水陸無量雜華所謂阿提目多華瞻婆

香華波吒羅華婆師迦華蘇曼那華由提迦
華優鉢羅華波頭摩華俱物頭華芬陀利華
迦羅娑華摩訶迦羅娑華如是等類諸雜名
華光飾山王處處充徧是山王中常於夜半
興大密雲輕雷細雨從初至末漸徧其山八
功德水流滋普洽如犖乳頃廓然消散涼風
微動適悅身心是山王中所住衆生及諸卉
木滋潤光澤如妙華鬘微加水灑光色鮮明
倍更增勝此山王中衆生草木含滋發暉亦
復如是而此山中生諸輦草霍靡右旋色香

具足青綠暉映如孔雀咽其香喻若婆師迦
華其觸又類輕毳羅絲枝葉華果繁榮茂盛
未嘗有一不具足者山地柔軟無傷趾步下
足之時陷深四指舉足之時還復如故其中
多有陂泉池沼清冷盈滿生雜蓮華青黃赤
白紅紫玻瓈金火等色大如車輪香氣普熏
一踰繕那是山王頂生於大妙寶蓮華座無
降伏寶帝青金剛以爲其莖大吠瑠璃爲諸
寶鐸瞻部檀金爲廣淨葉順時清淨栴檀爲
臺瑪瑙寶玉以爲其鬚其華縱廣猶如大海

十億阿脩羅王常所執持十億雜色摩尼寶
網彌覆其上十億龍王雨妙香雨十億金翅
鳥王口銜繒綵十億緊那羅王至誠瞻仰十
億摩睺羅伽王虔恭俯視十億乾闥婆王歌
詠讚歎十億百千諸大天帝興布瑞雲而雨
末香燒香衣服華鬘幢幡寶蓋十億梵王曲
躬恭敬十億淨居天衆合掌頂禮十億轉輪
人王七寶侍從來至其所十億海王從大海
出而敬禮之十億光明摩尼寶以爲照曜十
億淨福摩尼寶珠爲勝莊嚴十億徧照摩尼

寶爲無垢藏十億妙光摩尼寶爲大照明十
億雜色摩尼藏寶而爲徧照瞻部幢寶爲善
安持十億金剛師子摩尼寶難勝莊嚴十億
日藏摩尼寶間錯厠填廣大嚴飾十億不思
議摩尼寶出種種色爲妙莊嚴十億如意寶
出無盡莊嚴是大蓮華從於如來超過世間
善根所生菩薩志意之所愛慕徧現諸方從
如幻法出善法業生以無諍法性理趣莊嚴
如夢法性以無行法印順無著理徧滿十方
一切法界是順佛境功德所致若於無量阿

僧祇劫歎其色相功德莊嚴不可窮盡爾時
世尊於其華上結跏趺坐與大比丘衆八千
人俱其名曰尊者阿若憍陳如尊者阿濕婆
氏多尊者摩史波摩訶男優陀夷耶舍富那
無垢善臂憍梵鉢提優樓頻螺迦葉那提迦
葉摩訶迦葉舍利弗大目犍連阿那律須菩
提離波多富樓那彌多羅尼子優波離羅睺
羅難陀等而爲上首悉皆覺悟自性諦理現
證實際入法本性度諸有海行於如來虛空
之行悉能永斷隨眠結縛而於攝藏住無所

住行空寂靜於如來所永斷疑惑入佛智海
勝信道中利益世間爲不請友常能衛護一
切衆生與諸有情爲不捨友通達佛法所行
境界守護聖法誓願受持諸佛正教現前得
生如來種性善能趣向一切智智復有菩薩
摩訶薩衆八千人俱普賢菩薩文殊師利菩
薩等而爲上首所謂最上智智菩薩最上寶
智菩薩一切語言智菩薩無著智菩薩華上
智菩薩日上智菩薩月上智菩薩無垢上智
菩薩金剛智菩薩遠塵智菩薩光幢菩薩妙

高幢菩薩寶幢菩薩無礙幢菩薩華幢菩薩
淨幢菩薩日幢菩薩端嚴幢菩薩離垢幢菩
薩徧照幢菩薩陀羅尼威德菩薩寶威德菩
薩大威德菩薩金剛智威德菩薩無垢威德
菩薩日威德菩薩月威德菩薩福山威德菩
薩智照威德菩薩普勝威德菩薩地藏菩薩
虛空藏菩薩蓮華藏菩薩寶藏菩薩日藏菩
薩清淨功德藏菩薩法海藏菩薩徧照藏菩
薩齊藏菩薩勝蓮華藏菩薩日眼菩薩淨眼
菩薩無垢眼菩薩無礙眼菩薩普明眼菩薩

善利智眼菩薩金剛眼菩薩寶眼菩薩虛空
眼菩薩普眼菩薩天冠菩薩照法界摩尼冠
菩薩妙菩提摩尼冠菩薩照十方冠菩薩出
現一切佛藏冠菩薩超一切世間冠菩薩普
照冠菩薩無映蔽冠菩薩執持一切如來師
子座冠菩薩普照法界虛空冠菩薩梵王髻
菩薩龍王髻菩薩一切佛變化影像髻菩薩
妙菩提髻菩薩一切願海音聲摩尼王髻菩
薩放一切如來圓光摩尼寶雷聲髻菩薩一
切虛空無差別表示摩尼寶網覆髻菩薩一

龍一

九

切如來法輪聲髻菩薩一切三世名輪聲髻
菩薩大光菩薩無垢光菩薩寶光菩薩離塵
光菩薩照光菩薩法光菩薩寂靜光菩薩日
光菩薩神變光菩薩天光菩薩福光菩薩智
光菩薩法光明菩薩神通光菩薩光照菩薩
華光菩薩寶光菩薩覺光明菩薩梵光菩薩
普照光菩薩梵音菩薩海音菩薩地吼音菩
薩世間王音菩薩山王音菩薩山王相擊音
菩薩徧法界音菩薩一切法海雷音菩薩摧
伏諸魔音菩薩大悲理趣雲雷音菩薩徧息

一切世間苦惱音菩薩法勝涌菩薩殊勝涌
菩薩智勝涌菩薩福須彌勝涌菩薩功德最
勝涌菩薩名聞勝涌菩薩普光勝涌菩薩大
慈勝涌菩薩智照勝涌菩薩如來種性勝涌
菩薩光德菩薩勝德菩薩法涌德菩薩徧照
德菩薩法德菩薩月德菩薩虛空德菩薩寶
德菩薩寶德菩薩光德菩薩智德菩薩婆羅
帝王菩薩法帝王菩薩象帝王菩薩梵帝王
菩薩山帝王菩薩衆帝王菩薩天帝王菩薩
寂靜帝王菩薩不動帝王菩薩最勝帝王菩

薩菩提寂靜聲菩薩無著聲菩薩地聲菩薩
大海聲菩薩音聲菩薩照法聲菩薩虛空聲
菩薩一切聲菩薩善根雷聲菩薩發悟本願
聲菩薩推一切魔軍聲菩薩智須彌覺菩薩
虛空覺菩薩清淨覺菩薩無礙覺菩薩開寤
覺菩薩照三世覺菩薩寶覺菩薩廣大覺菩
薩普光覺菩薩法界理趣照覺菩薩如是等
菩薩摩訶薩八千人俱皆悉安住普賢願行
所行無著者普徧一切諸佛刹故變無邊身
者親近一切佛如來故所緣無際限境界清

龍一

十

淨者了知一切佛神變故趣無量者往詣諸
佛現等覺處無休息故無邊光明者於一切
法實相海中得無邊智光明故無邊劫中說
功德無盡者辯才清淨故等虛空界者智所
行境清淨故無所依者隨世意樂現色身故
能離翳者了知無有衆生界故虛空智慧者
放光明網徧法界故究竟寂靜者最寂靜心
故一切陀羅尼種性智境界者於三摩地勇
猛無畏者眼住法界盡其際者於一切法住
無所得者遊無邊智海者已度智彼岸者般

若波羅密多者般若波羅密多到一切世間
波羅密者於三摩地彼岸得自在者復有五
百比丘尼俱其名曰摩訶波闍波提比丘尼
瞿曇彌比丘尼安隱比丘尼優鉢羅華比丘
尼瘦瞿曇彌比丘尼耶輸陀羅比丘尼等而
為上首復有五百優婆塞俱其名曰善威德
優婆塞天威德優婆塞慧光優婆塞名稱威
德優婆塞超名稱威德優婆塞善慧優婆塞
月德優婆塞月歡喜優婆塞大歡喜優婆塞
羅睺賢優婆塞大賢優婆塞等而為上首復

龍一

十一